

Muchanan a briya den apertura di Olimpiada Escolar Betico Croes 2007

Hopi scol rond di Aruba participando



Diasabra ultimo pa 5'or di atardi a tuma e lugar apertura di Olimpiada Escolar Betico Croes 2007 den stadion Guillermo Prospero Trinidad. Mayoria di scolnan participando na e olimpiada tabata den e defile pa asina e publico presente por a cera conoci cu e scolnan tur uniforma. Un publico grandi tabata anima e muchanan dunando nan curashi pa e dos simannan di competencia cu ta spera nan. Diferente mandatario, invitadonan tambe tabata presente pa por presencia e apertura oficial di e olimpiada escolar. E antorcha olimpico a wordo acompaña pa dos atleta, Maikel Rasmijn y Jorella Croes, kendenan despues a cende e vlam olimpico. Minister di Labor Cultura y Deporte sr. Ramon Lee a dirigi su mes na e publico presente y principalmente na e muchanan cu ta competiendo den e Olimpiada Escolar Betico Croes 2007.

Presidente di parlamento di Aruba sra. Mervin Wyatt-Ras tambe a dirigi algun palabra na tur esnan presente.

E Olimpida Escolar Betico Croes 2007 lo wordo dedica na e instancianan aki cu ta Caribbean Mercantile Bank N.V., Andina Ice, Tropical Bottling Co., Quik Electrical Services N.V., Arugas N.V., y Cuerpo di Bombero Aruba. Tur e instancianan aki ta pone nan aporte y confiansa pa di 6 aña consecutivo den e Olimpiada Escolar Betico Croes y kendenan a ricibi nan reconocimiento den forma di plakaat.

Tur esnan presente tabata hopi entusiasmo pa e gran show di apertura cu a wordo dirigi pa Marisol Rodrigues-Peña titula "Disciplina y Ehempel pa nos Muchanan" hunto cu bailarinanan di Timbirichi y Lolipop. Artistanan invita tabata Juan Pablo Romeo, Daren Vrolijk, Kisia Trimon, Jonathan Thiel y Hilly-Ann Croes. Cancion composita pa Edseline Figaroa y aregla pa Otrish Schmith hunto cu Kavin James. Un show espectacular bon cordina y dirigi, caminda cu a participa no menos cu 100 mucha den e show.

E atardi a wordo completa cu candeloso partido di futbol entre scol Colegio Felipe B. Tromp y Paulus school cu a termina na favor di di Paulus School cu e score di 3-1.

Na nomber di ministerio di Labor, Cultura y Deporte pa medio di su minister sr. Ramon Lee ta gradici tur esnan cu a percura pa un tremendo apertura oficial di Olimpiada Escolar Betico Croes 2007. Un danki y elogio ta bai specialmente na IDEFRE cu a percura pa coordinacion di defile di scolnan participante y na Fundacion Lotto pa Deporte pa tur su aporte financiero na e scolnan.

Palabra di hopi exito tambe na tur e scol, maestro y maestranan, alumnonan participante y cu e mihor scol vence.

